



SO WORD DIE OUES WEER JONK

● Piet Beukes tussen die jong klomp van Springbok-Stormloop toe hulle vir hom op Stellenbosch gesing en gejoel het nadat hy hulle toegesprek het.

Vertroulik Aan U *Deur Piet Beukes*

Jeug Is Besiel ~~Met~~ Nuwe Doel En Geesdrif

ONS JONG MENSE GAAN

AFRIKA GROOT MAAK

Nico Ferreira Se Blink Idee

MENSE, nou is ek besied en geesdriftig. Besied deur ons land se jong mense, en geesdriftig oor ons toekoms.

Suid-Afrika het die talente, die leierskap, die gawe, die vermoë en die krag om 'n groot, ryk, gelukkige en tevrede land hier vir al die rasse en volke wat hier woon, op te bou. Ons jong mense gaan dit doen.

Hoekom sê ek dit? Omdat ek as gasspreker uitgenooi is om die jongmense van Springbok-Stormloop op Stellenbosch die afgelope week toe te spreek. Ek het met die jong klomp gaan praat oor die uitdagings wat voor ons almal staan.

Maar pleks dat ek hulle besiel en bemoedig, het hulle my toe met hulle geesdrif, hulle spontane natuurlikheid, hulle energie en lewenslus oorweldig.

2e Chris Barnard

Dit was vir my 'n wonderlike ondervinding om so tussen hulle te wees en te sien hoeveel talente, hoeveel leierskap daar onder die jong klomp is wanneer hulle met die regte gees besiel is en 'n doel het wat groter as hulleself is.

En die eer vir hierdie uitstaande sukses van Springbok-Stormloop kom 'n jong leier van ons land toe wat op sy gebied 'n Tweede Chris Barnard kan word—dis op die gebied van rasse-verhoudings en van diens aan die hele Afrika.

Laat ek hom aan u voorstel, Nico Ferreira, 'n seun van Oendaalsrus uit die Vrystaat, die stigter van Springbok-Stormloop, 'n kenner van Afrika en 'n leier van Jong Suid-Afrika wat berge kan versit met sy geloof, sy insig en sy leierskap.

Klein Begin

Alle groot dinge in die lewe begin altyd klein. En Nico Ferreira het ook klein begin. Eers het hy as staatsamptenaar in die Departement van Bantoesake gewerk. Maar toe kry hy die idee dat hy die swart volke van Afrika beter moet leer ken.

Hy is toe vir twee jaar na die nuwe swart state. En hy het sy jong vroultjie saamgevat. Sy is

Loel Rubidge van Richmond in die Karoo, dogter van die boer, mnr. Charles Rubidge, wat die goue medalje verwerf het vir die beste grondbewaring in die land.

Saam is hulle vir twee jaar na Nigerië, na Kenia, Ghana, Ethiopië, Zambia, Botswana, Malawi en uiteindelik ook na Rhodesië. Daar het Nico Ferreira se oë oopgegaan.

S.A. As Leier

„Ek het gesien hoe nodig hierdie nuwe volke ons in Suid-Afrika het. As gevolg van my verblyf en my werk in die swart lande het ek besef watter leierskaprol Suid-Afrika het om te speel op die vasteland van Afrika.

„Sonder ons leierskap sal Afrika nooit ontwikkel nie. En dit sal veral op die skouers van vandag se jong geslag val, want dis die taak wat die volgende 25 tot 50 jaar aangepak sal moet word. Dit het my die idee gegee om iets te doen om ons jong mense op te lei vir hierdie groot taak wat vir hulle wag,” het Nico Ferreira aan my verduidelik.

Eerste Dertien

Toe hy 18 maande gelede in ons land terug was, het hy sy idee om 'n skool vir leierskap te stig eers met 'n klompie jong mense bespreek. Hulle was dadelik geesdriftig. Nico sê self dit was 'n idee waarvoor die tyd ryp was.

Toe, in Desember 'n jaar gelede, het Nico 'n stappie verder gegaan en 'n konferensie in Johannesburg belê om die idees prakties toe te pas. Dertien jong mense het vorentoe gekom en hulle dienste aangebied om hom te help. „Ons sal permanent saamwerk,” het hulle gesê.

Op grond daarvan het Nico

Ferreira die skool vir leierskap begin en dit Springbok-Stormloop—Springbok stampede in Engels—genoem.

Dadelik was dit duidelik dat daar behoefte aan so 'n skool vir leierskap was en sover het 800 jong mense die afgelope jaar vorentoe gekom om daarby aan te sluit. Van hulle het meer as 'n honderd permanent na die opleidingsentrum gekom wat Nico met hulp van vriende by Bryanston net buite Johannesburg opgerig het.

Daar studeer hulle nou onder leiding van dr. Malie Smuts vir hulle matriek, grade of wat ook al om hulleself vir die take van leierskap in die toekoms te bekwaam.

Sien Hulle In Aksie

Nou het ek die voorreg gehad om 'n klomp van hulle op die konferensie vir leierskap wat hulle in Stellenbosch gehou het in aksie te sien.

Mense, dis die ware lewe daardie. Die ongeveer honderd jong seuns en dogters wat daar saam was in Stellenbosch se stadhuis het sommer daar en



• Jos Slabbert (links), is produksieleier van die S.S. en het sy B.A.-graad aan die Universiteit van Pretoria behaal. Helen Horn (regs), een van die sekretaresse van die voltydse groep en redaktrise van die S.S.-blad HOEFSLAG. Sy's 'n oud-Matie.

dan vir my 'n konsert gegee, gesing en gejoel en oorgeloo van geesdrif, warme jong lewe. Later was ek tussen hulle om saam te sing, my arms in die lug te stoot en my ou bene op te skop.

Toe wou hulle hê ek moes saam met hulle eet. Ons is na die kombuis. Daar was ek verbaas om te sien hoe twee dogters van 16 en 22 verantwoordelik is vir al die kos tweekeer per dag vir meer as 'n honderd mense.

Twee Dogters

Hulle is Maia Knoetze van Vanderbijlpark, wat nog maar net 16 is, en Marietha Olivier, 22 jaar oud, dogter van professor Fanie Olivier, hoof van die Indiër-universiteitskollege van Durban. Maia se pa is hoof van die Sebokeng-Bantoeoord buite Johannesburg.

Daar het Marietha Olivier voor die groot stowe gestaan om lekker skaapboude, groen ertjies, gestoofde pampoem en geelrys vir die middagete voor te berei, terwyl Maia Knoetze na die Strand was om die aandete daar vir die honderd honger mae te gaan klaarmaak.

Mense, besef julle wat dit is wanneer 'n dogter van 16 'n ete vir 'n honderd op haar eie kan voorberei?

Binne in die saal was Helen Horn, die hoofsekretaresse van Springbok-Stormloop, besig om vir die vales te tik. Sy kom van Vaalharts en was eers onderwyseres maar leer nou om sekretaresse te word.

Plakkate Ontwerp

Langs haar het Jeanette Crawford wat van Durban kom, die plakkate ontwerp en geskilder wat vir die konserte gebruik word. Gerrit Steyn van Vaalharts het intussen as voorsitter van die konferensie opgetree, terwyl Jos Slabbert die afriqter is van die hele groot opvoering.

Pieter Horn, 'n broer van Helen, wat ook van Vaalharts kom, is intussen die spil waarom



• Nico Ferreira, hoof direkteur van Springbok-Stormloop wat 'n nuwe veld vir die jongmense van ons land oopgemaak het.

alles draai omdat hy al die vervoer moet reël en ook elke aand R10.000 se apparate op die verhoog moet hê vir die konserte. Hy word gesteun deur Michael Horn, sy broer wat maar net 18 is.

Dis seuns van 20 en 18 wat hierdie verantwoordelike werk kan verrig, terwyl 'n seun van 17, Michael Morris, al die werk agter die skerms van die verhoog elke aand moet reël. Michael is van Pietermaritzburg en was 'n matriek-leerling.

Intussen het hierdie jong klomp nog by al hul werk vir die Springbok-Stormloop ook 'n groot sukses van hul studies gemaak. Almal van hulle wat vir standerd nege geskryf het, het met eerste klasse geslaag en die matriek-leerlinge wag nou op hul uitslae.

„Nico, ek is verbaas. Jy het my oë oopgemaak. Dis 'n plesier om hier te wees,” het ek aan hom gesê.

„Ja, dis 'n fantastiese ding wat hier aan die gang is, baie groter as wat ek ooit gedroom het dit sou word. Die leierskap wat onder ons jong mense na vore kom is ongelooflik,” het hy geantwoord.

Wat is die geheim van die sukses daarvan? Dis omdat Nico Ferreira, nadat hy self die lig van die ware lewe gesien het, besef het dat jong mense nie in ydelheid en weelde wil leef nie, nie alles vir hulle gedoen wil hê nie, maar self wil uitspring, self dinge wil verrig, self leierskap wil openbaar solank hulle 'n doel in die lewe het wat groter en belangriker as hulleself is.

Groter Dinge

Nou kon hierdie groep reeds groter dinge vir ons land begin doen. Hulle het al 'n Springbok-Stormloop uit ons land na Amerika gestuur om vir die Amerikaners te wys hoe geesdriftig en besied ons jong mense is en hoe toegewyd aan die groot taak om Afrika op te hef. Dit was 'n groot sukses.

'n Paar weke gelede het 'n paar lede van Springbok-Stormloop ook gehelp om 'n byeenkoms van jong Bantoes in Swaziland te organiseer. As gevolg daarvan gaan agt jong Swazis nou onder hulle eie volk werk om 'n gees van verantwoordelikheid aan hul eie mense oor te dra.

„Ons besef dat die kortste pad

van Kaapstad en Pretoria na ons ou bakermat Europa deur die nuwe onafhanklike swart lande van Afrika loop. Daarom moet ons in die jare wat voorlê ons daarop toelê om die regte verhouding met hierdie vasteland van Afrika te ontwikkel, sodat daar wedersydse respek en samewerking sal wees,” het Nico in sy openingsrede gesê.

Stuur R100

Mense, ek wil die beweging by u almal aanbeveel. As u meer besonderhede wil hê, tree in verbinding met Nico Ferreira by posbus 1155, Kaapstad, of by posbus 260, Bryanston, Transvaal. En onthou, Springbok-Stormloop het ook u geldelike steun nodig sodat hy sy vlerke wyer kan spreid om aan nog meer jong mense 'n doel en 'n taak in die lewe te gee.

„As ons nog net R10.000 meer kan bykry, kan ons berge versit,” is soos Nico dit uitdruk.

Omdat ek glo dat dit waar is, stuur ek uit my eie sak R100 na Springbok-Stormloop. Wie wil my voorbeeld volg in belang van die jong mense van ons land en van ons TOEKOMS?



• Die twee JONG DOGTERS, Marie Knoetze van Vanderbijlpark, 16 jaar oud en Marietha Olivier (22), van Durban wat elke dag twee groot maaltye vir 100 honger mae voorberei.